

niglich wer es begertt umbs geldt wägenn unnd lassenn ein pfundtt karpenn, waß zweyfundig unnd druber ist, umb ein groschenn, waß aber drunder, das pfundtt umb eilff pfennigk, unnd ein pfundt hechte fur zween groschen, auch rechte unvorfelschte wagenn unnd fleischergewichte haben.

Elbfische. Alle elbfische groß unnd klein sollenn hinfuro von dem frombdenn unnd einheimischen fischern ann der Elbenn nicht vorkaufft, sondern alßbaldt sie damitt ankommenn, ohne ainigen behelff oder betrugk uff einmahl unnd nicht entzeln herein uff den Altenmarekt bey denn rohrkastenn, darzu sonderliche troge gesetzt unnd gemacht, gebracht unnd doselbst wie fur alters stehende inn zimlichenn kauff unnd gleichmessigen werth menniglich, wer sie begern wirdtt (idoch soll dem hoffekuchemeister der vorkauff wie inn fleischbenckenn vorbehaltenn sein) vorkaufft werdenn, bey vorlust der fische, die inenn auff churfurstlich erleubnus der rath ohne des amptts wissen macht habenn soll zu nhemenn, inn die spittal zu gebenn.

Gesaltzene unnd dorre fische. Were do gesaltzene fische aufschlecht, auch sonst andere fische anhero zum marckte brengett, der soll damitt den marck drey tage unnd ferner nicht halten unnd bynnenn derselbten zeitt die fische sampttlich nicht vorkeuffenn nach auß tonnenn in fas legenn, bey straff eins sielbern schocks. Unnd soll auch ein iderer dorr fische unnd anders an gewonlicher stelle der niderlage abelegenn inmassen solchs alles wie hero bracht.

Die bosen faulen fische unnd anders, so ufm marckte gemercktt, soll ein jeder burger und einwohner bey vormeydung eins sielbern schocks anzusagen schuldigk sein.

Alle wochenn soll der kauff an fischen und herrigen durch denn stadtrichter oder marcktmeister nach empfangenem bericht von denenn, so niederlage haltenn, dennjenigenn, so sie vorpfennigenn, nach gelegenheit der zeitt unnd gutte geschatztt werdenn.

Lichtkauff.

Die lichte sollenn diejenigenn, so damitt handtyren, menniglich die es begern unnd habenn wollenn, umbs geldtt wegenn unnd das pfundtt fleischergewicht fur zween groschenn gebenn unnd sollenn 24 pfenniglichte ein pfundtt wegenn. Welcher die lichte theurer gibtt unnd nicht wegenn will, mag der straff gewarttenn.